

ЖИЗЗАХ ВОҲАСИННИНГ ҲАЙВОНЛАР КУЛЬТИ БИЛАН БОҒЛИҚ ЗИЁРАТГОҲЛАРИ

Акчаев Фаррух Шавкатович (*Жиззах ДПИ Тарих ўқитиши методикаси кафедраси катта ўқитувчиси*)
akchayev_1984@inbox.ru

Annotation

Ушбу мақолада Жиззах воҳаси аҳолиси томонидан бир неча асрлар давомида муқаддас деб зиёрат қилиб келинаётган ҳайвонлар культи ва уларни муқаддаслаштириш билан боғлиқ айрим муқаддас қадамжо ва зиёратгоҳлари тўғрисидаги халқона қарашлар ва уларда ўтказиладиган маросимлар хусусида фикр юритилган. Шунингдек, муқаддас қадамжо ва зиёратгоҳлар тўғрисидаги қарашлар замирида ибтидоий диний тасаввурлар таркибиغا киравчи тотемезим, анимизм ва фетишизмга хос бўлган урфодатлар ҳам сақланиб қолинганлиги эътироф этилган.

Калит сўзлар: Жиззах воҳаси, тарихий-этнографик минтақа, муқаддас қадамжо ва зиёратгоҳлар, Ҳайвон культи ва уларни муқаддаслаштириш билан боғлиқ зиёратгоҳлар, Бутатош вали, Қоплон ота, Хўроз ота ва Новқа ота зиёратгоҳлари, Норчўкди, тош соатлар, экологик қўриқхона.

Annotation

В статье рассматривается культ животных, который веками почитался жителями Джизакского оазиса, а также некоторые священные места и святыни, связанные с их освящением. Также признается, что традиции тотемизма, анимизма и фетишизма, которые являются частью примитивных религиозных идей, были сохранены в основе взглядов на священные места и святыни.

Ключевые слова: Джизакский оазис, историко-этнографический край, священные святыни и святыни, святыни, связанные с культом животных и их освящением, святыни Бутатош вали, Коплон ота, Хороз ота и Новка ота, Норчокди, каменные часы, экологический заповедник.

Annotation

This article discusses the cult of animals, which has been revered by the people of the Jizzakh oasis for centuries, and some of the sacred places and shrines associated with their sanctification. It is also acknowledged that the traditions of totemism, animism and fetishism, which are part of primitive religious ideas, have been preserved at the heart of the views on sacred sites and shrines.

Keywords: Jizzakh oasis, historical and ethnographic region, sacred shrines and shrines, shrines related to the cult of animals and their sanctification, shrines of Butatosh vali, Qoplon ota, Khoroz ota and Novka ota, Norchokdi, stone clocks, ecological reserve.

Юртимизда бугунги кунда халқимизнинг қадимий тарихи ва бой маданий меросини тиклаш ҳамда уни дунё жамоатчилигига етказиш борасида кўплаб муҳим ишлар амалга оширилмоқда. Ўзбекистоннинг бошқа тарихий-этнографик минтақалари каби Жиззах воҳаси ҳам ўзига хос, муҳим стратегик аҳамиятга эга ҳудуд бўлиб, воҳани минг йиллар мобайнида қулай географик ўрни ва Буюк ипак йўли чорраҳасида жойлашганлиги сабабли ғоят хилмажил маданиятлар ва анъаналар туташган, ўзаро уйғунлашган ҳолда шаклланган макон сифатида қайд этиш мумкин. Шу боисдан ҳам ҳозирда Жиззах воҳаси зиёратгоҳларини анъанавий халқ маданиятининг феномени тарзида тадқиқ қилиш долзарб аҳамият касб этмоқда.

Соҳа мутахассисларининг фикрларига кўра муқаддас қадамжолар ва зиёратгоҳларни таснифлаш борасида турли қарашлар ва ёндавшувлар мавжуд. Жумладан, шу йўналишда тадқиқот олиб борган олимлардан Н. Абдулаҳатов водийда мавжуд бўлган муқаддас қадамжоларнинг географик жойлашувига кўра тўрт гуруҳга ажратган бўлса¹ (Марғилон, Кўқон, Фарғона ва Сух ҳудудларига хос зиёратгоҳлар), З. Абидова эса Хоразм воҳасига доир зиёратгоҳларнинг тарихий келиб чиқишига эътибор қаратган ҳолда саккиз гуруҳга бўлиб таснифлаган (пайғамбарлар номи билан

¹ Абдулаҳатов Н. Фарғона водийси зиёратгоҳлари ва қадамжолари (Фарғона вилояти мисолида): Тар.фан. ном. учун дисс. – Тошкент, 2006. – Б. 14.

аталадиган, саҳобалар ва уларнинг издошлари билан боғлиқ, турли касбларнинг ҳомий пирлари номлари билан ҳамда табиат кучлари билан боғлиқ бўлган зиёратгоҳлар)².

Жиззах воҳаси зиёратгоҳларини ҳам географик ва тарихий келиб чиқишига кўра таснифлаш мумкин. Шу билан бир қаторда, айрим ҳусусий ҳолатлар ҳам борки, буларни инобатга олмаслик муқаддас қадамжоларнинг воҳага хос кўринишларини очиб бериш имконини чеклайди. Муаммони жой номи билан, муқаддаслаштирилган хайвонлар билан боғлиқ томонлари ҳам мавжуд. Бундан ташқари воҳа зиёратгоҳларини ҳалқ қарашлари, тасаввурлари, жойлашган ўрни ва функциясидан келиб чиқиб, муқаддас саналган булоқлар, дараҳтлар, тошлар ва ғорлар билан боғлиқ яна бир қанча кичик гуруҳларга ҳам бўлиш мумкин. Шунингдек, мавжуд зиёратгоҳларнинг ҳалқ орасидаги аҳамиятидан келиб чиқиб, республика, вилоят, туман ва маҳаллий каби шаклларга ажратиш мумкин. Юқорида келтирилган сабабалар ва бошқа омилларни ҳисобга олган ҳолда Жиззах воҳасига оид зиёратгоҳларни қўйидагича таснифлашни мақсадга мувофиқ деб билдиқ:

1. Авлиёлар ва диний уламолар билан боғлиқ зиёратгоҳлар;
2. Табиат мўъжизаси ва географик обьектлар билан боғлиқ зиёратгоҳлар;
3. Ҳайвон культи ва уларни муқаддаслаштириш билан боғлиқ зиёртгоҳлар.

Қўйида биз Жиззах воҳасининг ҳайвон культи ва уларни муқаддаслаштириш билан боғлиқ айрим муқаддас қадамжо ва зиёртгоҳлари тўғрисидаги ҳалқона қарашлар ва уларда ўтказиладиган маросимлар ҳусусида фикр юритамиз.

Бутамош вали зиёратгоҳи. Янгиобод тумани Юқорисармич қишлоғида жойлашган бўлиб, зиёратгоҳда буталоқни эслатувчи маҳаллий аҳоли ўртасида муқаддас саналган тош мавжуд. Тош атрофини 3x3 кв.метр

² Абидова З. Хоразм воҳаси зиёратгоҳлари ва қадамжолари: тар. фан. бўйича фал. док. (PhD) учун дисс. автореф. – Тошкент. – Б. 16.

ҳажмдаги оддий кўринишдаги айвонли хонақоҳ ўраб туради. Зиёратгоҳ худуди тахминан 1 гектарни ташкил этиб худуд манзарали дараҳтлар ва гуллар экилиб ободонлаштирилган³.

Маҳаллий аҳоли вакилларининг таъкидлашларича Тожикистон Республикаси Шаҳристон тумани Холдорқипчоқ қишлоғида Туятоши вали зиёратгоҳи бўлиб бу ерда жойлашган Бутатош вали зиёратгоҳи шу билан боғлик экан. Туятош ва Бўтатошлар авлиё ёки авлиёларнинг түяси деган қараш мавжуд. Зиёратгоҳни вужудга келиши тўғрисида аҳоли ўртасида куйидагича ривоят сақланиб қолган.

Туятош болалари билан динни тарғиб қилиб юрган пайтида уни душманлар таъқиб қилиб ўлдириш мақсадида қувлашади. Шунда Туятош Аллоҳга илтижо қилиб, душманлар унга зарар етказа олмаслиги мақсадида фарзандига қаратса “Тош бўл” дейди ва фарзанди бўталоқ кўринишидаги тошга айланиб қолади.

Аҳоли ушбу тошни бир неча маротаба сел оқизиб кетмаслиги учун жойидан бироз тепароқга кўчиришган, аммо тош яна ўз ўрнига қайтиб келаверган. Маҳаллий аҳоли ушбу зиёратгоҳга фарзандли бўлиш, тутқаноқ ва жин чалди касалликларидан фориғ бўлиш мақсадида келиб, пахта пиликли чироқ ёқишиади, хайри эхсон сифатида эса ўzlари билан олиб келган оқ матони тош устида қолдириб кетишиади⁴.

Қоплон ота зиёратгоҳи. Зомин туманининг Қовункесди ва Бешбулоқ қишлоқлари оралиғида жойлашган. Тарихчи олим Алексей Грицина “Қоплон ота” зиёратгоҳи пайдо бўлиши ҳақида шундай афсонани келтиради. “...Шу атрофда яшайдиган бир чўпон “қашқаси бор бир қўзини худойи қилиш”ни кўнглига тушибди.

Бир қанча вақт ўтиб, қўзи катта бир қўчкорга айланибди-ю чўпоннинг кўнглидан “мен қўзи худойи килишга ваъда берувдим, шунинг учун бу

³ Дала тадқиқотлари. Янгиобод тумани, Юқорисармич қишлоғи. 2014 йил июль.

⁴ Поччаев Сайдхўжа 54 ёш. Янгиобод тумани Юқорисармич қишлоғи, Абузар жомъе масжиди имом хатиби. 2014 йил, июль.

күчкорни бозорга олиб бориб сотиб иккита кўзи оламан-да, бирини худойи киламан-у, бирини кўтонга кўшиб юбораман” деган ўй ўтибди.

Кўчкорни сотгани бозорга ҳайдаб йўлга тушибди. Шу атрофга яқин жойда “Кўчкор ота” деган жой ҳам бор. “Қоплон ота”га келганида қаёқдандир забт билан пайдо бўлган бир қоплон ҳалиги кўчкорни белига ўнгариб тоққа чиқиб кетибди! “Капалаги учиб кетган” чўпон қўрқиб-писиб уйига қайтиб келиб кўрган-билганини қишлоқдошларига айтиб берибди. Учтўртта ботир қишлоқдошлар айтилган манзилга келиб қарашса, ҳалиги кўчкор мўъжаз булоқ бўйида кекса тут дарахти остида бўйнидан боғланган ҳолда тик турган эмиш! Қора қоплон эса ҳеч жойда кўринмасмиш. Шу куни қишлоқдошлар йиғилиб ўша жойда кўчкорни сўйишиб худойи қилишибди. Чўпоннинг иши шу кундан бошлаб ўнгланибди, шу атрофнинг энг бой кишисига айланган экан”. “Қоплон ота” зиёратгоҳи худудида сағана бўлиб, уни Аҳмад ибн Сайф Бурҳониддиннинг қабрлари шу жойда, деган қараш мавжуд. Манзилгоҳдаги шифобахш саналган булоқ атрофида, минг йиллик кекса тут ва тол дарахтлари жойлашган⁵.

Хўрор ота зиёратгоҳи. Зомин туманинг Туркман қишлоғининг тоф томонга кетадиган торроқ йўлак буйидаги қирда жойлашган бўлиб, бу зиёрат масканини вужудга келиши билан боғлиқ маҳаллий аҳоли ўртасида қуидагича ривоят сақланиб қолган. Ушбу қишлоқда яшовчи Туркман уругиниг бир шахобчаси Чувиллок уруғи асосчиларидан бири бўлган Дўстназар чол узоқ йиллар давомида фарзанд кўрмайди. Бир куни ушбу зиёрат маскан олдидан ўтаётганда келинчак қиёфасидаги бир аёл пайдо бўлиб ушбу кишига 6 дона кулча беради. Ушбу воқеадан сўнг Аллоҳ Дўстназар чолга 6 та ўғил беради. Ҳозирги кунда ушбу қишлоқда яшовчи Туркман уругининг 3/2 қисми шу отадан тарқалган⁶. Бу ерга зиёратчилар асосан оиласи маросимларни ўtkазиш учун ташриф буюради куз ойларида

⁵ Оға Бургутли. Жиззах вилояти зиёратгоҳлари.-Т.: 2008 й. Б-32.

⁶ Салимов Холмурод 66 ёш. Зомин тумани Туркман қишлоғи. 2016 йил, апрел.

10 тагача мол суйиб қурбонлик қилишади. Яна ўзига хос маросимий хусусияти шундан иборатки ушбу жойга бир дона чироқ ёкишади⁷.

Новқа ота зиёратгоҳи. Бахмал туманинг жанубий-шарқида, Туркистон тоғ тизмалари этагидаги Новқа қишлоғининг қўхна “Новқа ота” қабристонининг ёнгинасида, “Новқа ота” зиёратгоҳи жойлашган.⁸

Ўлкашунос Оға Бургутлининг таъкидлашича, зиёратгоҳнинг “Новқа ота” дея номланишини кўпроқ “Нақъатун” (арабча) - яъни “туя” маъноси билан боғлашади. Илмий адабиётларда жуда кўп бор дуч келганимиз - Науқат, Науқат, Навқанд, Навқад (Навқадий) атамалари ҳам айнан шу заминга тааллукли. Маҳаллий аҳоли ўртасида зиёратгоҳнинг пайдо бўлиши тўғрисида қуидагича ривоят бор: “...Балх шаҳридан йўлга чиққан бир түя хомиладор аёлни олиб келиб шу жойга чўкади. Бола туғилиб тирноқлари билан ерни тирнаса сув сизиб чиқади ва бола балиққа айланиб кетади...”.

Қишлоқ ҳудудида “Норчўқди” деган жой номи бор. Бу жойда яқин-яқингача кичик бир тепалик бўлиб, қишлоқ одамлари бу тепаликни “ривоятдаги аёл тусини чўқтирган жой ва айнан туюнинг қолдифи” деб уқтиришар, чунки тепаликка узокдан қаралса, ҳақиқатдан ҳам ҳудди чўкиб ётган туяга ўхшаб кетарди⁹.

Ўлкашунос Сайид Азимнинг “Бахмалнома” китобида шундай жумлалар келтирилган: “Уструшона давлати таркибидаги шаҳарларнинг бири ҳозирги Новқа булоғи атрофида бўлганлиги бу шаҳар “Науқат” деб аталганлиги, у Сўғдан Шошга ўтадиган ёзги карвон йўли ёқасида жойлашганлиги ва Науқат шаҳри XIII асрда Марказий Осиёни мўғуллар босиб олганидан кейин бузилиб кетган”¹⁰ лиги қайд этилган.

Бизнинг бу борадаги қузатишимиизча, мазкур зиёратгоҳ ҳудуди қадимда зардуштийлик динининг маросимлари ўтказиладиган жой бўлган. Чунки, шаҳарсозлик маданияти тўғрисидаги маълумотлар шундан дарак

⁷ Дала тадқиқотлари. Зомин тумани Туркман қишлоғи. 2016 йил, апрел.

⁸ Дала тадқиқотлари. Бахмал тумани, Новқа ота қишлоғи, Новқа ота зиёратгоҳи. 2014 йил, август.

⁹ Оға Бургутли. Жиззах вилояти зиёратгоҳлари. Т.:2008 й. Б-9.

¹⁰ Сайид Азим. Бахмалнома. Жиззах.: “Сангзор” нашриёти. 2001. Б.59-60.

берадики, маълум бир худуд шаҳар деб аталадиган бўлса, унда албатта ибодатхона бўлган. Новқа ота зиёратгоҳига туташ қадим қабристон худудида эрамизнинг бошларига оид тош соатларнинг ҳозиргача сақланиб қолганлиги, демакки, шаҳар бўлганлиги ва унда зардуштийлик ибодатхонаси жойлашганлигига ишора.

Археолог М.Пардаевнинг тадқиқотларида Новқа ота зиёратгоҳининг шимолий-ғарбий қисмида, сойнинг чап қирғоғида жойлашган VI-VIII асрларга оид Навкат археология ёдгорлиги ҳақидаги фикрлар мавжуд. Тадқиқотчининг фикрича, “Навкат” сўғдча атама бўлиб, “Нав”-янги, “кат”, “кет”, “кент”-“қишлоқ”, “қўргон” маъносини англатган. Демак, “Новқа” сўзи аслида Навкат, Навкет, Навкент атамасидан ҳосил бўлган ва Янгикент, Янгиқишлоқ, Янгиқўргон маъноларини англатади¹¹.

Хулоса сифатида шуни таъкидлаш керакки, ҳайвонларни муқаддаслаштириш билан боғлиқ зиёратгоҳларнинг вужудга келиши, кўп ҳолларда ўша хайвонни маҳаллий аҳоли орасида қултъ даражасига кўтарилиши ҳамда айрим авлиёларга нисбат берилиши натижасида вужудга келган. Бу каби зиёратгоҳларда асосан қадамжо ҳайвон номи билан аталади. Бу ҳайвонларнинг зиёратгоҳга қай даражада алоқадорлиги ҳақида аниқ маълумотлар учрамайди. Айрим ривоят ва асотирларда бундай номлар чорвадор аҳоли қатламишининг фаолияти натижасида юзага келгани борасида фикрлар учрайди.

Воҳа зиёратгоҳларини маълум тизимга солиши асосида ўрганиш, уларга хос ҳусусиятларни тўлақонли очиб бериш ва ўхшаш ҳамда фарқли томонларини кўрсатиш имконини беради. Жиззах воҳасига оид қадамжо ва зиёратгоҳларни тузилиши ва жамиятдаги функцияси бошқа худудлар билан ўзаро муштарак ҳолда шаклланган бўлсада, уларнинг вужудга келишига оид қарашлар, у ерда бажариладиган маросимлар воҳа аҳолисининг худудий

¹¹Пардаев М.Х. Отчет Джизакского отряда по Бахмалскому району Джизакской области за 1986 год. Архив института Археологии АНРУз. Самарканд, 1987.

қарашларини, ижтимоий турмуш тарзи ҳақида тасаввурларни шакллантиришда мұхим ақамият касб этади.

